

欽定剿平粵匪方略

欽定勦平粵匪方略卷八十 甲寅年

二月十六日 乙酉 僧格林沁勝保奏言逆匪竄入

富莊驛恐被我兵兜勦分其前隊千餘名竄入  
阜城 臣勝保督帶馬隊千名星夜馳抵阜城抄  
截 臣僧格林沁密派官兵在富莊驛迤南設伏  
該逆於十二日寅刻向南潰竄 臣僧格林沁帶  
兵追勦斃賊八百餘名該逆隨分兩翼抄襲我

兵衝入賊隊復斃賊七百餘名是日約斃賊一千六百餘名生擒三百餘名臣勝保繼至復督馬隊官兵迎擊斃賊數百名該逆另出一股接應經臣勝保派令營總那爾胡善等帶兵殺退斃賊數十名該逆竄入阜城及附近各村臣僧格林沁派侍郎瑞麟等在北面屯紮十三日丑刻帶領馬隊官兵由閒道繞至阜城迤南將西

南之高家莊宋家莊二處攻破一面搜殺一面  
燒燬房屋隨督兵進至後康莊有逆匪六百餘  
名在內盤踞欲與城內賊衆爲犄角之勢臣僧  
格林沁當飭西凌阿等帶領步隊官兵攻撲經  
文岱首先攻進樹柵參領關福等拔毀木壘官  
兵一擁前進該逆見我兵攻入村內手足失措  
我兵刀矛並進斃賊三百餘名逃出村外一百

餘名經馬隊官軍盡行殄滅匿入樓房二百餘  
名我兵四面放火立時燒斃其西北黨村亦經  
賊踞臣勝保等督兵攻擊斃賊一百餘名該逆  
經此次痛剿殊足以寒賊膽

僧格林沁又奏言暫行革職總兵經文岱十三  
日攻擊後康莊親督官兵撲入賊壘斬殺長髮  
賊多名可否仰懇

恩施開復原官併

賞還翎頂之處出自

聖裁

同日桂良奏言賊匪於十一日由獻縣奔至富莊驛地方經僧格林沁督帶馬隊擊斃多名該匪復竄至阜城縣境現在大兵跟蹤追勦臣派赴獻縣防堵之署都司陳毅等拏獲騎馬賊二

名內有楊庭居一名自稱漢陽縣人然口操廣西土音據同獲之長髮賊魚士有等均指認爲僞丞相林鳳詳惟該犯堅不承認現已解送大營是否實係林逆由該大臣等質訊明確分別辦理

同日袁甲三奏言查蒙城之賊先來者實係土匪隨後逆匪踵至並貼有僞示前列僞官許陳

二姓其眞長髮者甚屬寥寥皆由六安正陽而  
來於蒙城北關搭蓋浮橋四道有竄擾宿州並  
直趨徐州之意本月初七日蒙城縣知縣劉瀛  
階帶同團練數百人直抵城下而逆賊大隊已  
向西北亳州永城竄去臣以先到永城之賊若  
東竄宿州東北竄徐州處處可通而後到蒙城  
之賊其所向尙未可知遂酌留義兵千餘名駐



守南坪以防北竄臣於初十日亥刻行抵宿州  
西旺埠距永城七十里賊已於是日午刻由永  
城竄往西北並聞後路之賊復有分赴亳州之  
說現在南來之賊其勢方張臣一經遠離則宿  
州不堪設想委員徐曉峯等本紮營於蒙城西  
路二十餘里聞蒙城後至之賊向永毫一路而  
去該文武趕卽進城彈壓招撫乃居民不敢遠

行入城是蒙城之民心渙散已屬無計可施惟  
有請

旨迅飭北路領兵大員及河南山東各巡撫確探賊蹤  
攔頭截擊勿令與北賊會合其正陽關門戶

飭令和春等撥兵扼守以絕來路庶該逆首尾不能相  
顧尙可分路剿除

袁甲三又奏言查此次逆匪陸續分竄均由正

陽關而來該處爲水路通衢距六安州百餘里  
牛鑑能否扼守尙未可定昨接廬州紳士信稱  
廬賊竄出不下兩萬人潛赴六安另有巢縣賊  
船千餘隻接濟廬州逆情詭譎或係外面不動  
聲色牽掣廬州大兵實則分股他往與北賊接  
應正陽之路不塞無論竄出之賊未能卽時撲  
滅卽果能隨到隨除而往來相續其患何所底

止和春等攻復廬州尙無確耗能否兼顧正陽  
亦未可知臣惟有俟此路賊蹤稍定宿徐可以  
無憂卽帶兵勇前往正陽並將參將劉玉豹所  
帶山東兵一千就近移赴正陽歸臣統帶均奏  
八

上命軍機大臣傳諭僧格林沁勝保曰逆匪竄踞阜城  
縣城並分踞村莊爲犄角之勢若不乘此聲威奮力

進擊恐又蔓延爲患著該大臣等趕緊進剿將首逆  
悉數殲擒頃據袁甲三奏皖省逆匪竄擾亳永一帶  
顯係意圖北竄與直隸逆匪互相勾結河南兵力甚  
單若俟直隸軍務告竣始行撥兵前往應援恐有貽  
誤著僧格林沁勝保迅撥馬步精兵一千名揀派得  
力大員管帶星夜馳赴歸德一帶探明賊蹤迎擊會  
同英桂相機剿辦不令皖匪闖入京旗各營兵調赴

大營者爲數不少勢難再行分撥惟該大臣等追剿逆匪正在喫緊之際儘必須撥兵協剿卽著迅速奏明辦理又據桂良奏署都司陳毅等拏獲逆首林源詳現已解赴大營著僧格林沁等審明該犯如實係林逆迅卽派員解京現在皖楚賊氛已偪豫境較前情形更爲緊急是以令該大臣等分兵往援尙恐一千名不敷剿辦若此股賊匪不能剋日殄滅致令大

兵爲所牽掣遲延貽誤之罪更將何辭張亮基現帶  
兵勇馳赴景州以北正可前後夾擊使逆匪腹背受  
敵自不難迅就掃除也

上又命軍機大臣傳諭桂良曰賊匪由富莊驛南竄阜  
城僧格林沁等跟蹤追捕後路尤關緊要逆匪聲東  
擊西是其慣技現雖逃竄東南距省較遠然亦難保  
不乘間他竄該督務當察看情形相機堵禦或自行

出省防守或令署提督張殿元帶兵擇要駐紮必須  
悉心籌畫斷不可株守省城致有貽誤

上又命軍機大臣傳諭袁甲三曰據奏逆匪有竄擾宿  
州並直趨徐州之意徐廣縉牛鑑所帶兵勇由歸德  
陳州出境迎剿尙恐未能得力刻下廬州派來之兵  
如尙未到著卽派員迎提飛催來營參將劉玉豹所  
帶山東官兵一千餘名亦可就近調遣確探賊蹤迎



頭截擊毋令勾結爲患並著隨時知會和春福濟英桂等併力勦辦迅掃賊氛

上又命軍機大臣傳諭和春福濟曰現在河間束城逆匪南竄阜城皖省逆匪又由永城竄往西北儻南北兩股乘間勾結勦辦更形棘手且恐與廬州之賊潛通消息前調廬州大營之兵如已起程卽飛催前進交袁甲三調遣並著和春福濟迅攻廬州設法斷賊

來往勾結之路隨時確探賊情勿墮奸計

上又命軍機大臣傳諭英桂鄭敦謹曰逆匪大股由蒙城西北竄往亳州永城又有由永城他竄之說袁甲三跟追至宿未能繞出賊前碭山夏邑一帶處處宜防雖歸德有徐廣縉所帶兵勇牛鑑亦馳赴陳州但兵力尙單恐未足遏其兇鋒英桂前奏暫駐汝郡原爲各路應援現在楚省逆賊雖盤踞漢陽竄擾沿江

地面而皖省之賊已入豫境英桂自當扼要嚴守切不可顧此失彼本日諭令僧格林沁等迅撥精兵一千名派員帶往河南與英桂會剿其河南各路將弁兵勇及柏山所帶官兵均准此次派往大員相機調撥至省城並河北各屬距賊雖遠亦應嚴密設防著卽責令藩司鄭敦謹妥爲布置並將近日軍情迅速奏聞

上諭內閣曰逆匪自奔竄富莊驛後向南潰竄我兵分  
路兜擊屢戰屢勝僧格林沁勝保等調度有方奮勇  
追勦深堪嘉尙僧格林沁勝保等各賞給威羅瓦佛  
一尊白玉翎管各一枝白玉搬指各一箇黃辦珊瑚  
豆大荷包各一對所有打仗出力之二等侍衛達崇  
阿著賞給蘇彰阿巴圖魯名號吉林營總關保著賞  
給年昌阿巴圖魯名號健銳營委前鋒參領關福著

以副前鋒參領升用盛京營總昇仲黑龍江佐領委  
營總巴揚阿委參領業普鏗均著賞戴花翎藍翎驍  
騎校委參領富克精阿著賞換花翎巡捕營千總何  
健鼇著以京營守備升用先換頂戴巡捕營六品頂  
翎把總回國慶著以京營千總升用經文岱著開復  
原官並賞還翎頂

同日

上諭內閣曰前任江甯將軍托明阿著幫辦軍務馳驛  
前赴僧格林沁勝保軍營

同日王履謙奏言臣由柳口北渡往查下游各  
口復由山東劉口渡河溯查上游南岸直至孟  
津口折回北岸於二月初十日行抵祥河工次  
所有豫東南北兩岸上下游官渡民渡逐口稽  
查其船隻除官渡酌留應用外餘俱卸舵去桅

收集淨盡卽委文武各員專駐河口稽察臣明  
查暗訪俱各認真惟聞獨流靜海賊匪全股竄  
逸難保無奸匪改裝易服溷跡偷渡前已札飭  
各口文武如遇楚粵口音更須加意嚴查至虎  
牢關爲上游險要之區臣聞洛陽縣知縣舒亨  
熙等所帶練勇協防虎牢關實能不分畛域容  
臣查察得實奏請

恩施奏入報

聞

十七日

丙戌

駱秉章鮑起豹奏言接岳州府賈亨

晉稟稱二十八日逆船仍在漢口金日停泊勾

引通山通城等處土匪有擾及崇陽之說該郡

居民搬徙一空又探稱初一日午刻賊船竄至

岳州城陵磯賈亨晉會營上城守禦詎賊匪已



到城外愈聚愈多兵勇衆寡不敵賊匪已入西  
門現在賊由岳州上竄湘陰縣城外查湘陰縣  
離省百里一水可通連日北風大作舟行甚速  
省城爲根本重地亟須先事豫防臣等一面飭  
委將備帶兵在城廂內外駐紮惟城外兵勇尙  
屬不敷聞曾國藩已抵湘潭臣等復節次咨催  
該侍郎迅帶練勇來省會商迎剿以期滅此朝

食岳州府城文武員弁下落容俟查明另辦臣  
駱秉章臣鮑起豹均有地方之責未能先事防  
範相應請

旨交部議處奏入

上命軍機大臣傳諭駱秉章曾國藩鮑起豹曰逆船在  
漢口金口勾引通山等處土匪擾及崇陽闖入岳州  
城內現已竄至湘陰距省甚近急應派撥將弁兵勇

前往堵勦省城防守最爲喫緊會國藩旣已行抵湘  
潭著該侍郎迅帶礮船練勇馳赴省垣會勦前據該  
撫等奏岳州爲水陸交衝陸續派撥兵勇一千名交  
該府賈亨晉等統帶駐紮並咨江西令將南省派往  
兵勇五千八百餘名酌量撤回何以賊至岳州並無  
兵勇接仗遽令關入其出省勦辦土匪之署參將塔  
齊布並江西撤回之兵勇此時是否均已趕到著略

秉章卽速催調妥爲布置鮑起豹節制全省軍務著  
與該撫酌量緩急相機迎勦岳州失守文武員弁下  
落迅卽查明奏聞至荆襄一帶與湖南接壤地方是  
否有另股賊船駛往滋擾並著隨時確探具奏

同日張亮基奏言查本月初二日委員陳韜等  
在直東邊界截獲逆匪王小湧劉鳳彩二名據  
王小湧供稱上年九月閒投入賊營逆首林淵

詳因其兇悍用爲親軍十一月二十三日羣逆  
攻撲官兵營盤該犯用長矛刺殺都統佟鑑見  
知縣謝子澄前往趨救該犯卽在陣前大喝活  
捉天津謝知縣羣賊遙擁向前槍礮齊施旋聞  
謝知縣已死羣賊憚其威名互相慶賀劉鳳彩  
供稱屢與官兵接仗亦爲林逆信用是該二犯  
確係賊營遣出緊要頭目無疑查謝子澄忠勇

素著聞其陣亡遠近軍民無不同聲痛憤今兇  
渠就擒應卽解往天津寸磔致祭惟由德州至  
津必經河間恐致疏虞臣於審明後將該犯等  
正法並摘取王逆之心在德州城外爲都統佟  
鑑天津縣知縣謝子澄設位遙祭以慰忠魂而  
快衆憤奏入

上諭曰佟鑑奮勇捐軀深堪憫惻謝子澄素得民心效

死疆場今旣獲逆犯王小湧其爲戕官逆犯無疑已  
經摘心遙祭洵足以快人心著該旗傳知佟鑑家屬  
俾伊家自行告祭並著該部亦傳知謝子澄家屬以  
慰忠魂

張亮基又奏言查皖省逆賊直撲永城顯欲渡  
河北犯曹單黃河渡口雖有武隆額等統帶兵  
勇督防惟兵力尙慮單弱該逆果來應援北賊

勢必兇悍本省弁兵已無可抽調查濟甯州知  
州黃良楷勇敢素著臣已飛飭該員馳往並飭  
曹單兩縣及附近之荷澤鉅野濮州等五州縣  
各募精悍壯勇一千名交該州黃良楷統帶協  
同官兵實力堵禦並飭該護鎮道等將渡口船  
隻盡數收藏所有運銷鹽船亦飭停運務使該  
逆無船可掠以杜偷越奏入報



十八日丁亥僧格林沁勝保奏言臣等查阜城縣

西北之堆村連村杜家場三處地勢平坦攻剿  
可以得手十五日卯刻親督達洪阿等各帶官  
兵同時進攻兩村逆匪俱由牆孔施放連環槍  
礮我兵奮勇齊進切近賊柵由兩村撲出逆匪  
一千餘名欲抄我兵之後臣僧格林沁當令馬

隊官兵奮力截擊一面仍飭步隊官兵極力攻  
撲將堆村連村屋上賊匪盡行殺斃村內逆匪  
並無一名走脫總兵孔廣順等攻擊杜家場臣  
勝保策馬指揮我兵先用草束火藥燃燒鹿角  
柵連殺賊匪二百餘名該逆卽由南面撲出五  
六百名經那爾胡善等追殺全數剿滅卽由堆  
村連村擁出逆匪一千餘名經馬隊官兵在村

外圍擊臣僧格林沁飭貝勒拉木棍布扎布等  
將馬隊官兵壓下逆衆向東飛奔欲進阜城西  
門我兵緊追斃賊五六百名城內擁出逆匪三  
四百名直撲我兵接應敗賊臣勝保與臣僧格  
林沁合兵一處復又斃賊三四百名該逆狂奔  
入城此次兵勇追剿逆匪斬獲甚多立破賊巢  
三處尤屬奮勇出力當卽賞給兵勇銀一萬兩

至該逆狡猾異常其藏事之期不敢豫定然賊  
匪屢受懲創斷難蔓延北竄之虞似可無慮

僧格林沁勝保又奏言查賊奔河隄時善祿傳  
知駐紮大禮文之總兵德坤遊擊格洪額出隊  
截殺詎德坤差弁回稱恐小禮文有賊俟天明  
始能出隊迨天微明善祿又傳知德坤格洪額  
帶兵追賊乃遲至逾時方到茲據德坤等呈報

沿路追殺賊匪希圖諱過邀功現當勦賊喫緊之際該鎮等乃敢任意延緩致誤事機相應請旨將兗州鎮總兵德坤三屯營遊擊格洪額卽行革職仍責令帶罪自效

僧格林沁又奏言本月十五日進攻賊巢頭等侍衛巴隆阿二等侍衛達崇阿等十九員身受槍傷仍負痛殺賊尤堪嘉尙除巴隆阿由王家

口追賊出力經臣僧格林沁保奏

賞給頭等侍衛爲日無多達崇阿業經請

賞勇號該二員均不敢再邀

恩獎外謹將尤爲出力之員繕寫清單懇給獎勵奏入

上命軍機大臣傳諭僧格林沁勝保曰逆匪經此次痛

剿存城賊黨無多必當乘勝將縣城攻克生擒首逆

不得因其勢已窮蹙遂謂可以無慮儘任該逆空濠

築壘爲負嵎之計或又乘閒奔突不但西向武邑南  
向景州蔓延爲患卽東濱運河亦防其復行掠船偷  
渡官兵分投追勦又落後著惟有趁其蟻聚城中一  
鼓殲擒況皖境賊匪大股已由蒙城亳州竄入河南  
永城而徐州蕭縣黃家口地方又有土匪爲賊嚮導  
並有將擾徐州之謠是皖賊北竄情形萬分緊急該  
大臣等不速將阜城之賊悉數掃除儻永亳等處逆

賊分路衝突又將何以禦之德勒克色楞現在何處  
駐紮何以兩次奏報並未見其帶兵攻勦著遇便覆  
奏

上諭內閣曰逆匪竄踞阜城縣城分占附近各村經我  
兵兩次痛勦勢已窮蹙著僧格林沁勝保督飭將弁  
趕緊殲除勿留餘孽其尤爲出力之頭等侍衛巴隆  
阿二等侍衛達崇阿身受槍傷仍負痛殺賊深堪嘉



尙著僧格林沁等傳旨嘉獎山西大同鎮總兵孔廣  
順著賞給噶爾薩巴圖魯名號巡捕中營副將史榮  
椿著賞給哈希巴巴圖魯名號副將用天津鎮遊擊  
吳傑著賞給奇車博巴圖魯名號副將銜陝甘督標  
揀發參將樂善著賞給阿克敦巴圖魯名號升用遊  
擊涼州營都司文魁著賞給穆特恩巴圖魯名號副  
護軍參領慶昌色普徵額均著以護軍參領升用佐

領博恩著以副參領升用委護軍參領毓福著以副  
護軍參領升用委前鋒參領海羣著以副前鋒參領  
升用委參領祿昌著以協領升用前鋒校烏林布百  
祥德興均著以委前鋒參領升用護軍校和連著以  
委護軍參領升用烏槍護軍校鳳山定福均著以空  
花翎升用烏槍護軍校全廣著賞給六品頂翎卓索  
圖盟協理台吉布木濟特察哈爾總管約遜黑龍江

墨爾根協領那爾胡善吉林三姓協領豐山紅德城  
營守備楊殿林均著賞戴花翎署守備朱起鴻都司  
李鴻寶守備保升都司龍汝元均著賞換花翎都司  
用守備額音額守備陶植劉長清候補守備千總白  
鳳龍署千總田敦信員善外委丁永安候補額外  
委霍振國署外委楊大喜哲里木盟兵海壽黑龍江  
領催蓋哈蘇漢中等營兵丁蕭明鳳劉成功趙禮六

品軍功王致祥均著賞戴藍翎武生王萬年著以把  
總用川勇頭目傅國成著以外委用均著賞戴藍翎  
侍衛蘊秀著開復原官天津勇目趙奎七著賞給六  
品頂翎棟發湖北遊擊薩爾善著毋庸發往湖北歸  
部以遊擊儘先選用並賞戴藍翎守備銜千總徐璋  
著以守備用外委宋永興著免補把總以千總升用  
外委唐福王玉恆均著以千總儘先升用馬兵常山

王勳史永祿均著以把總儘先升用藍翎長成祿著以鳥槍護軍校升用

上又諭內閣曰兗州鎮總兵德坤三屯營遊擊格洪額於賊奔河隄時未能截擊復捏報沿途追殺賊匪希圖諱過邀功厥罪甚重德坤格洪額均著革職仍責令帶罪自效如再不知奮勉卽著以軍法從事

同日桂良奏言查賊匪分竄景州境內若奔向

西路武邑最爲緊要應駐重兵防其竄赴衡水  
冀州等處現令署提督張殿元帶領馬步各隊  
官兵一千二百名卽日前往駐守其故城所屬  
之安陵鎮附近景州爲南運河要路現經飛飭  
總兵伊綿阿等帶馬步各隊官兵八百餘名星  
馳前往防其由河岸竄赴故城一帶臣仍一面  
勤加偵探如實在後路緊急卽當酌度情形親

督官兵堵擊奏入報

欽定四庫全書

三

同日琦善奏言臣約會艇船水陸夾攻均獲勝  
仗旬日以來該艇船株守焦山延不上駛據總  
兵葉常春等稟稱火藥鉛彈將次用竣臣疊咨  
兩江督臣怡良迅飭蘇州總局撥解未准咨覆  
目下東風順利未免坐失事機不若將火藥鉛

彈寬爲豫備先由蘇州運至京口糧臺艇船一  
有所需朝發夕至不致有缺乏之虞惟有仰懇  
天恩飭下兩江總督飭令蘇州總局豫將火藥鉛彈撥  
運京口糧臺寬爲存留以便隨時接濟

琦善又奏言二月初四日南岸逆船三十餘隻  
均插新旗開放槍礮由大江揚帆西去總兵武  
慶督率遊擊王巨孝等前往金湯門一帶暗爲



防範該逆船行至老西江口折回至九洲地  
方全行上岸搶擄百姓燒燬民房該總兵卽帶  
兵迎勦該逆一見官兵旋即逃竄回船官兵施  
放槍礮火箭燬賊大船一隻小船二隻溺賊多  
名餘船均行逃去奏入

上命軍機大臣傳諭琦善怡良許乃釗曰水師制勝火  
器爲先著怡良許乃釗迅飭蘇州總局委員將應用

一切火器寬爲豫備趕緊運赴京口糧臺所有焦山水師船隻卽遵前旨統歸琦善節制調遣該署總兵李德麟等儘敢抗不遵調及遷延不進卽著按律懲辦該大臣務及早克復瓜州勿再遲延貽誤

同日福濟奏言據候選知州江忠濬稟稱有楚勇周昌發等將江忠源屍身由紫金壠城上垛口用繩縋下更番背負至岡子集總兵音德布

營中於正月初五日收殮伏念江忠源忠義性  
成力戰殉節聞歸屍之日面色如常兩目不瞑  
想見報

國滅寇之志雖死猶生臣等曷禁隕涕又繁昌縣  
知縣張廷槐於十二月十九日賊匪攻撲縣城  
帶勇迎敵因賊衆另股踰城該令爲賊擒獲罵  
不絕口慘被剖心支解並將首級懸竿家丁方

植在旁救護亦被砍傷身死查該令在繁昌疊  
次與賊接仗頗著勤勞此次兵單城陷猶能巷  
戰多時罵賊捐軀死事最爲慘烈並同時戰歿  
勇目陶蒼林武生強占鼇等仰懇

天恩飭部一併議卹奏入

上諭內閣曰前任安徽巡撫江忠源因廬州被陷臨陣  
捐軀當經降旨追贈總督建立專祠並准其入祀昭

忠嗣復將伊弟江忠濟江忠濬先後分別加恩以知府知州用因念江忠源身經百戰力守危城厥功甚偉卒以外援不力效命行間每憶孤忠時深矜惻其靈柩回籍時著福濟和春派委委員護送出境並著沿途地方文武各官妥爲照料

上又諭內閣曰安徽繁昌縣知縣張廷槐於賊匪攻撲縣城時帶勇巷戰手刃多人嗣因賊衆另股踰城鄉

勇同時戰歿該縣屬賊不屈以致剖心支解被害慘烈實堪嘉憫張廷槐著加恩照知府陣亡例賜卹並於殉難地方建立專祠勇目陶蒼林武生強占鼇及該縣家丁方楨同時被害均著一併議卹

同日百勝王夢齡奏言本日據碭山縣稟報逆匪由永城擾及夏邑該縣與夏邑交界之刷家集地方亦有逆匪查蒙城至徐州一路現有袁

甲三帶兵進剿自可無慮惟永夏至徐州可由  
蕭碭分道前來路徑紛歧防不勝防且徐州兵  
勇祇存大同兵九百名練勇千名並舉人李延  
忠添募壯勇五百名刻當寇氛逼近各處無兵  
可調全賴官民一氣併力防守查徐屬團練平  
日助官緝匪甚爲踴躍臣等飛飭蕭碭二邑廣  
爲號召並調集存城兵勇分赴隘口嚴密布守

臣百勝統帶官兵進駐徐城以西二十五里之王家牐地方以扼蕭碭至徐州總路惟郡城甚屬空虛現據在籍知縣張夢麟等自願於團練中挑選壯丁五千名來郡捍衛臣等又飭舉人李廷忠添募練勇五百名並飭調附近河營兵二百名來郡儘何路有警臣百勝統兵上前迎擊臣王夢齡帶領練勇民勇在後策應斷不敢



任其竄越惟徐州西北係與東豫二省接壤無  
兵攔截應請

旨飛飭河南山東巡撫速派重兵實力防禦無任蔓延  
奏入

上命軍機大臣傳諭百勝王夢齡曰逆匪由潁上蒙城  
分竄永城並擾夏邑距徐州甚近該處兵力單弱該  
處兵等自應督飭地方官實力團練蕭縣黃家口地

方又有土匪肆行焚掠難保非逆賊勾通令其先爲  
嚮導百勝現駐徐州靈附近之處何路有警卽著統  
兵趕緊迎擊並飭王夢齡帶領練勇等於各處要隘  
嚴密設防萬不可令匪蹤闖入該總兵等仍當與和  
春福濟袁甲三等並山東河南巡撫聯絡聲勢併力  
防剿

十九日

戊子

上命軍機大臣傳諭僧格林沁勝保曰逆匪旣陷永城復擾夏邑該處情形萬分緊急朕思阜城勦辦賊匪正在喫緊之際前諭派兵一千名前赴歸德是否可以抽撥該大臣等若能於數日內攻克阜城便可移兵乘勝而南若再事遷延致豫境與徐州賊匪分股北竄豈能不派兵往勦著僧格林沁勝保統籌全局以現在賊情而論或急須撥兵前往或於勦滅此股

後再以重兵分路南下該大臣等接奉此旨迅速商酌具奏朕畀僧格林沁勝保勦賊重任斷不肯令爾等掣肘爾等亦當仰體朕宵旰焦勞之苦衷也

上又命軍機大臣傳諭舒倫保王慶雲曰前據袁甲三奏逆匪由蒙城穎上竄擾河南永城昨又據百勝等奏賊由永城擾及夏邑徐州邊界亦有賊蹤北路防緝緊要毗連黃河等處尤形喫重河南歸德一帶兵

力甚單本日已諭桂明酌帶潼關等處防兵一千五百名剋日起程前往迎勦其潼關一帶防堵事宜著舒倫保卽日馳往接辦該處防兵經桂明帶去後誠恐不敷布置著於西安滿洲營備調兵內酌帶五百名馳赴潼關及桂明所留官兵一併歸該將軍調遣舒倫保出省後西安駐防官兵現無大員統轄一切應辦事宜卽著王慶雲就近照料仍可與舒倫保隨

時商辦至商雒一帶防堵事宜亦關緊要仍著舒倫保等督飭道員陳景亮確探湖北賊蹤認真嚴防如須添調甘肅官兵並著與易棠隨時籌辦

上又命軍機大臣傳諭桂明曰昨據百勝等奏永城之賊竄及夏邑徐州蕭縣界內亦有賊蹤此時靜海竄出之賊尙在阜城一帶盤踞北路兵力旣難驟分廬州大兵又恐不能兼顧河南歸德等處兵數過單且

無大員督辦現在潼關大慶關等處駐紮官兵不下數千名卽著桂明酌帶精銳官兵一千五百名馳赴歸德一帶迎頭截勦萬不准藉詞耽延其歸德陳州原設防兵及徐廣縉牛鑑等所帶練勇均歸該提督調遣至潼關防堵事宜已飭舒倫保酌帶滿洲官兵由省接辦桂明不必俟舒倫保到關再行起程兵貴神速若行走稍遲致賊蹤闖入河北或沿河而西擾

及豫省腹地惟該提督是問桂明接奉此旨卽將起程日期先行馳奏